

# Captivi

Titus Maccius Plautus

## PERSONAE

ERGASILVS PARASITVS  
HEGIO SENEX  
LORARIVS  
PHILOCRATES ADVLESCENS  
TYNDARVS SERVVS  
ARISTOPHONTES ADVLESCENS  
PVER  
PHILOPOLEMVS ADVLESCENS  
STALAGMVS SERVVS

## ARGVMENTVM

Captus in pugna Hegionis filius;  
Alium quadrimum fugiens servus vendidit.  
Pater captivos commercatur Aleos,  
Tantum studens ut natum captum recuperet;  
Et inibi emit olim amissum filium.  
Is suo cum domino veste versa ac nomine  
Vt amittatur fecit: ipse plectitur;  
Et is reduxit captum, et fugitivum simul,  
Indicio cuius alium agnoscit filium.

## PROLOGVS

Hos quos videtis stare hic captivos duos,  
~illi qui astant, hi stant ambo, non sedent;  
hoc vos mihi testes estis me verum loqui.  
senex qui hic habitat Hegio est huius pater.  
sed is quo pacto serviat suo sibi patri,           5  
id ego hic apud vos proloquar, si operam datis.  
seni huic fuerunt filii nati duo;  
alterum quadrimum puerum servos surpuit  
eumque hinc profugiens vendidit in Alide  
patri huius. iam hoc tenetis? \*\*\* optime est.   10

negat hercle ille ultimus. accedito.  
si non ubi sedeas locus est, est ubi ambules,  
quando histrionem cogis mendicariet.  
ego me tua causa, ne erres, non rupturus sum.  
vos qui potestis ope vestra censerier, 15  
accipite relicuom: alieno uti nil moror.  
fugitivos ille, ut dixeram ante, huius patri  
domo quem profugiens dominum abstulerat vendidit.  
is postquam hunc emit, dedit eum huic gnato suo  
peculiarem, quia quasi una aetas erat. 20  
hic nunc domi servit suo patri, nec scit pater;  
enim vero di nos quasi pilas homines habent.  
rationem habetis, quo modo unum amiserit.  
postquam belligerant Aetoli cum Aleis,  
ut fit in bello, capitur alter filius: 25  
medicus Menarchus emit ibidem in Alide.  
coepit captivos commercari hic Aleos,  
si quem reperire possit qui mutet suom,  
illum captivom: hunc suom esse nescit, qui domist.  
et quoniam heri indauidivit, de summo loco 30  
summoque genere captum esse equitem Aleum,  
nil pretio parsit, filio dum parceret:  
reconciliare ut facilius posset domum,  
emit hosce e praeda ambos de quaestoribus.  
hisce autem inter sese hunc confinxerunt dolum, 35  
quo pacto hic servos suom erum hinc amittat domum.  
itaque inter se commutant vestem et nomina;  
illic vocatur Philocrates, hic Tyndarus:  
huius illic, hic illius hodie fert imaginem.  
et hic hodie expediet hanc docte fallaciam, 40  
et suom erum faciet libertatis compotem,  
eodemque pacto fratrem servabit suom  
reducemque faciet liberum in patriam ad patrem,  
imprudens: itidem ut saepe iam in multis locis  
plus insciens quis fecit quam prudens boni. 45  
sed inscientes sua sibi fallacia  
ita compararunt et confinxerunt dolum  
itaque hi commenti, de sua sententia  
ut in servitute hic ad suom maneat patrem:  
ita nunc ignorans suo sibi servit patri; 50  
homunculi quanti sunt, quom recogito!  
haec res agetur nobis, vobis fabula.  
sed etiam est, paucis vos quod monitos voluerim.  
profecto expediet fabulae huic operam dare.  
non pertractate facta est neque item ut ceterae: 55  
neque spurcidici insunt versus, immemorabiles;  
hic neque periurus leno est nec meretrix mala  
neque miles gloriosus; ne vereamini,  
quia bellum Aetolis esse dixi cum Aleis:

foris illic extra scaenam fient proelia. 60  
nam hoc paene iniquomst, comico choragio  
conari desubito agere nos tragoediam.  
proin si quis pugnam expectat, litis contrahat:  
valentiosem nactus adversarium  
si erit, ego faciam ut pugnam inspectet non bonam, 65  
adeo ut spectare postea omnis oderit.  
abeo. valete, iudices iustissimi  
domi duellique duellatores optumi.

## ACTVS I

I.i

ERGASILVS Iuventus nomen indidit Scorto mihi,  
eo quia invocatus soleo esse in convivio. 70  
scio absurde dictum hoc derisores dicere,  
at ego aio recte. nam scortum in convivio  
sibi amator, talos quom iacit, scortum invocat.  
estne invocatum an non <est? est > planissime;  
verum hercle vero nos parasiti planius, 75  
quos numquam quisquam neque vocat neque invocat.  
quasi mures semper edimus alienum cibum;  
ubi res prolatae sunt, quom rus homines eunt,  
simul prolatae res sunt nostris dentibus.  
quasi, cum caletur, cocleae in occulto latent, 80  
suo sibi suco vivont, ros si non cadit,  
item parasiti rebus prolatis latent  
in occulto miseri, victitant suco suo,  
dum ruri rurant homines quos ligurriant.  
prolatis rebus parasiti venatici 85  
sumus, quando res redierunt, molossici  
odiosicique et multum incommodestici.  
et hic quidem hercle, nisi qui colaphos perpeti  
potest parasitus frangique aulas in caput,  
[vel] ire extra portam Trigeminam ad saccum licet. 90  
quod mihi ne eveniat, non nullum periculum est.  
nam postquam meus rex est potitus hostium--  
ita nunc belligerant Aetoli cum Aleis;  
nam Aetolia haec est, illic est captus in Alide,  
Philopolemus, huius Hegionis filius 95  
senis, qui hic habitat, quae aedes lamentariae  
mihi sunt, quas quotienscumque conspicio fleo;  
nunc hic ocepit quaestum hunc fili gratia  
inhonestum et maxime alienum ingenio suo:  
homines captivos commercatur, si queat 100  
aliquem invenire, suom qui mutet filium.

quod quidem ego nimis quam cupio \*\*\* ut impetret;  
nam ni illum recipit, nihil est quo me recipiam.  
<nam> nulla est spes iuventutis, sese omnis amant;  
ille demum antiquis est adulescens moribus, 105  
cuius numquam voltum tranquillavi gratiis.  
condigne pater est eius moratus moribus.  
nunc ad eum pergam. sed aperitur ostium,  
unde saturitate saepe ego exii ebrius.

I.ii

HEGIO Advorte animum sis tu: istos captivos duos, 110  
heri quos emi de praeda a quaestoribus,  
eis indito catenas singularias  
istas, maiores, quibus sunt iuncti, demito;  
sinito ambulare, si foris si intus volent,  
sed uti adserventur magna diligentia. 115  
liber captivos avis ferae consimilis est:  
semel fugiendi si data est occasio,  
satis est, numquam postilla possis prendere.  
LORARIVS Omnes profecto liberi lubentius  
sumus quam servimus. HEG. Non videre ita tu quidem. 120  
LOR. Si non est quod dem, mene vis dem ipse -- in pedes?  
HEG. Si dederis, erit extemplo mihi quod dem tibi.  
LOR. Avis me ferae consimilem faciam, ut praedicas.  
HEG. Ita ut dicis: nam si faxis, te in caveam dabo.  
sed satis verborumst. cura quae iussi atque abi. 125  
ego ibo ad fratrem ad alios captivos meos,  
visam ne nocte hac quippiam turbaverint.  
inde me continuo recipiam rursus domum.  
ERG. Aegre est mi, hunc facere quaestum carcerarium  
propter sui gnati miseriam miserum senem. 130  
sed si ullo pacto ille huc conciliari potest,  
vel carnificinam hunc facere possum perpeti.  
HEG. Quis hic loquitur? ERG. Ego, qui tuo maerore maceror,  
macesco, consenesco et tabesco miser;  
ossa atque pellis sum miser a macritudine; 135  
neque umquam quicquam me iuvat quod edo domi:  
foris aliquantillum etiam quod gusto, id beat.  
HEG. Ergasile, salve. ERG. Di te bene ament, Hegio.  
HEG. Ne fle. ERG. Egone illum non fleam? egon non defleam  
Talem adulescentem? HEG. Semper sensi, filio 140  
meo te esse amicum, et illum intellexi tibi.  
ERG. Tum denique homines nostra intellegimus bona,  
quom quae in potestate habuimus, ea amisimus.  
ego, postquam gnatus tuos potitust hostium,  
expertus quanti fuerit nunc desidero. 145  
HEG. Alienus cum eius incommodum tam aegre feras,  
quid me patrem par facerest, cui ille est unicus?

ERG. Alienus ego? alienus illi? aha, Hegio,  
numquam istuc dixis neque animum induxis tuom;  
tibi ille unicust, mi etiam unico magis unicus. 150  
HEG. Laudo, malum cum amici tuom ducis malum.  
nunc habe bonum animum. ERG. Eheu, huic illud dolet,  
quia nunc remissus est edendi exercitus.  
HEG. Nullumne interea nactu' ,squi posset tibi  
remissum quem dixti imperare exercitum? 155  
ERG. Quid credis? fugitant omnes hanc provinciam,  
quoi optigerat postquam captust Philopolemus tuos.  
HEG. Non pol mirandum est fugitare hanc provinciam.  
multis et multigeneribus opus est tibi  
militibus: primumdum opus est Pistorensibus; 160  
eorum sunt aliquot genera Pistorensium:  
opus Paniceis est, opus Placentinis quoque;  
opus Turdetanis, opust Ficedulensibus;  
iam maritumi omnes milites opus sunt tibi.  
ERG. Vt saepe summa ingenia in occulto latent; 165  
hic qualis imperator nunc privatus est.  
HEG. Habe modo bonum animum, nam illum confido domum  
in his diebus me reconciliassere.  
nam eccum hic captivom adolescentem <intus> Aleum,  
prognatum genere summo et summis ditiis: 170  
hoc illum me mutare confido pote.  
ERG. Ita di deaeque faxint. sed num quo foras  
vocatus <es> ad cenam? HEG. Nusquam, quod sciam.  
sed quid tu id quaeris? ERG. Quia mi est natalis dies;  
propterea te vocari ad te ad cenam volo. 175  
HEG. Facete dictum. sed si pauxillo potes  
contentus esse. ERG. Ne perpauxillum modo,  
nam istoc me assiduo victu delecto domi;  
age sis, roga emptum: nisi qui meliorem adferet  
quae mi atque amicis placeat condicio magis, 180  
quasi fundum vendam, meis me addicam legibus.  
HEG. Profundum vendis tu quidem, haud fundum, mihi.  
sed si venturu' s, temperi. ERG. Em, vel iam otium est.  
HEG. I modo, venare leporem: nunc irim tenes;  
nam meus scruposam victus commetat viam. 185  
ERG. Numquam istoc vinces me, Hegio, ne postules:  
cum calceatis dentibus veniam tamen.  
HEG. Asper meus victus sane est. ERG. Sentisne essitas?  
HEG. Terrestris cena est. ERG. Sus terrestris bestia est.  
HEG. Multis holeribus. ERG. Curato aegrotos domi. 190  
numquid vis? HEG. Venias temperi. ERG. Memorem mones.--  
HEG. Ibo intro atque intus subducam ratiunculam,  
quantillum argenti mi apud trapezitam siet.  
ad fratrem, quo ire dixeram, mox ivero.--

## ACTVS II

### II.i

LORARII Si di immortales id voluerunt, vos hanc aerumnam exsequi, 195  
decet id pati animo aequo: si id facietis, levior labos erit.

domi fuistis, credo, liberi:

nunc servitus si evenit, ei vos morigerari mos bonust  
et erili imperio eamque ingeniis vestris lenem reddere.  
indigna digna habenda sunt, erus quae facit. 200

CAPTIVI Oh oh oh. 200a

LOR. Eiulatione haud opus est, oculis haud lacrimantibus:  
in re mala animo si bono utare, adiuvat.

TYNDARVS At nos pudet, quia cum catenis sumus. LOR. At pigeat postea  
nostrum erum, si vos eximat vinculis,  
aut solutos sinat, quos argento emerit. 205

TYND. Quid a nobis metuit? scimus nos  
nostrum officium quod est, si solutos sinat.

LOR. At fugam fingitis: sentio quam rem agitis.

PHILOCRATES Nos fugiamus? quo fugiamus? L. In patriam. P. Apage, haud  
nos id deceat,

fugitivos imitari. LOR. Immo edepol, si erit occasio, haud dehortor. 210

TYND. Vnum exorare vos sinite nos. LOR. Quidnam id est?

TYND. Vt sine hisce arbitris  
atque vobis nobis detis locum loquendi.

LOR. Fiat. abscedite hinc: nos concedamus huc.  
sed brevem orationem incipisse. 215

TYND. Em istuc mihi certum erat. concede huc. 215a

LOR. Abite ab istis. TYND. Obnoxii ambo  
vobis sumus propter hanc rem, quom quae volumus nos  
copia est ~ ea facitis nos compotes.

PHIL. Secede huc nunciam, si videtur, procul,  
ne arbitri dicta nostra arbitrari queant 220

neu permanet palam haec nostra fallacia.

nam doli non doli sunt, nisi astu colas,  
sed malum maxumum, si id palam provenit.

nam si erus mihi es tu atque ego me tuom esse servom assimulo,  
tamen viso opust, cauto est opus, ut hoc sobrie sineque arbitris 225  
accurate agatur, docte et diligenter;

tanta incepta res est: haud somniculose hoc  
agendum est. TYND. Ero ut me voles esse. PHIL. Spero.

TYND. Nam tu nunc vides pro tuo caro capite  
carum offerre <me> meum caput vilitati. 230

PHIL. Scio. TYND. At scire memento, quando id quod voles habebis;  
nam fere maxima pars morem hunc homines habent: quod sibi volunt,  
dum id impetrant, boni sunt;

sed id ubi iam penes sese habent,  
ex bonis pessimi et fraudulentissimi 235

fiunt: nunc ut mihi te volo esse autumo.

[quod tibi suadeam, suadeam meo patri.]

PHIL. Pol ego si te audeam, meum patrem nominem:

nam secundum patrem tu es pater proximus.

TYND. Audio. PHIL. Et propterea saepius te uti memineras moneo: 240

non ego erus tibi, sed servos sum; nunc obsecro te hoc unum--

quoniam nobis di immortales animum ostenderunt suum,

ut qui erum me tibi fuisse atque esse conservom velint,

quom antehac pro iure imperitabam meo, nunc te oro per precem--

per fortunam incertam et per mei te erga bonitatem patris, 245

perque conservitium commune, quod hostica evenit manu,

ne me secus honore honestes quam quom servibas mihi,

atque ut qui fueris et qui nunc sis meminisse ut memineras.

TYND. Scio quidem me te esse nunc et te esse me. PHIL. Em istuc si potes

memoriter meminisse, inest spes nobis in hac astutia. 250

## II.ii

HEGIO Iam ego revertar intro, si ex his quae volo exquisivero.

ubi sunt isti quos ante aedis iussi huc produci foras?

PHIL. Edepol tibi ne in quaestione essemus cautum intellego,

ita vinclis custodiisque circum moeniti sumus.

HEG. Qui cavet ne decipiatur, vix cavet, cum etiam cavet; 255

etiam cum cavisse ratus est, saepe is cautor captus est.

an vero non iusta causa est, ut vos servem sedulo,

quos tam grandi sim mercatus praesenti pecunia?

PHIL. Neque pol tibi nos, quia nos servas, aequomst vitio vortere,

neque te nobis, si abeamus hinc, si fuat occasio. 260

HEG. Vt vos hic, itidem illic apud vos meus servatur filius.

PHIL. Captus est? HEG. Ita. PHIL. Non igitur nos soli ignavi fuimus.

HEG. Secede huc. nam sunt quae ex te solo scitari volo.

quarum rerum te falsilocum mi esse nolo. PHIL. Non ero

quod sciam. si quid nescibo, id nescium tradam tibi. 265

TYND. Nunc senex est in tostrina, nunc iam cultros attinet.

ne id quidem, involucrium inicere, voluit, vestem ut ne inquinat.

sed utrum strictimne adtonsurum dicam esse an per pectinem,

nescio; verum, si frugist, usque admutilabit probe.

HEG. Quid tu? servosne esse an liber mavelis, memora mihi. 270

PHIL. Proximum quod sit bono quodque a malo longissime,

id volo; quamquam non multum fuit molesta servitus,

nec mihi secus erat quam si essem familiaris filius.

TYND. Eugepae, Thalem talento non emam Milesium,

nam ad sapientiam huius \*\*\* nimius nugator fuit. 275

ut facete orationem ad servitutem contulit.

HEG. Quo de genere natust illic Philocrates? PHIL. Polyplusio:

quod genus illi est unum pollens atque honoratissimum.

H. Quid ipse hic? quo honore est illic? P. Summo, atque ab summis viris.

HEG. [Tum igitur ei cum in Aleis tanta gratia est, ut praedicas.] 280

quid divitiae, suntne opimae? PHIL. Vnde excoquat sebum senex.



HEG. Quid pater, vivitne? PHIL. Vivom, cum inde abimus, liquimus;  
nunc vivat<ne> necne, id Orcum scire oportet scilicet.

TYND. Salva res est, philosophatur quoque iam, non mendax modo est.

HEG. Quid erat ei nomen? PHIL. Thensaurochrysonicochrysidēs. 285

HEG. Videlicet propter divitias inditum id nomen quasi est.

PHIL. Immo edepol propter avaritiam ipsius atque audaciam.  
[nam ille quidem Theodoromedes fuit germano nomine.]

HEG. Quid tu ais? tenaxne pater est eius? PHIL. Immo edepol pertinax;  
quin etiam ut magis noscas: Genio suo ubi quando sacrificat, 290  
ad rem divinam quibus est opus, Samiis vasis utitur,  
ne ipse Genius surripiat: proinde aliis ut credat vide.

HEG. Sequere hac me igitur. eadem ego ex hoc quae volo exquaesivero.  
Philocrates, hic fecit, hominem frugi ut facere oportuit.  
nam ego ex hoc quo genere gnatus sis scio, hic fassust mihi; 295  
haec tu eadem si confiteri vis, tua <ex> re feceris:  
quae tamen scio scire me ex hoc. TYND. Fecit officium hic suom,  
cum tibi est confessus verum, quam<quam> volui sedulo  
meam nobilitatem occultare et genus et divitias meas,  
Hegio; nunc quando patriam et libertatem perdidi, 300  
non ego istunc me potius quam te metuere aequom censeo.  
vis hostilis cum istoc fecit meas opes aequabiles;  
memini, cum dicto haud audebat: facto nunc laedat licet.  
sed viden? fortuna humana fingit artatque ut lubet:  
me, qui liber fueram, servom fecit, e summo infimum; 305  
qui imperare insueram, nunc alterius imperio obsequor.  
et quidem si, proinde ut ipse fui imperator familiae,  
habeam dominum, non verear ne iniuste aut graviter mi imperet.  
Hegio, hoc te monitum, nisi forte ipse non vis, voluerim.

HEG. Loquere audacter. TYND. Tam ego fui ante liber quam gnatus tuos, 310  
tam mihi quam illi libertatem hostilis eripuit manus,  
tam ille apud nos servit, quam ego nunc hic apud te servio.  
est profecto deus, qui quae nos gerimus auditque et videt:  
is, uti tu me hic habueris, proinde illum illic curaverit;  
bene merenti bene profuerit, male merenti par erit. 315  
quam tu filium tuom, tam pater me meus desiderat.

HEG. Memini ego istuc. sed faterin eadem quae hic fassust mihi?

TYND. Ego patri meo esse fateor summas divitias domi  
meque summo genere gnatum. sed te optestor, Hegio,  
ne tuom animum avariorē faxint divitiae meae: 320  
ne patri, tam etsi sum unicus, decere videatur magis,  
me saturum servire apud te sumptu et vestitu tuo  
potius quam illi, ubi minime honestumst, mendicantem vivere.

HEG. [Ego virtute deum et maiorum nostrum dives sum satis.]  
non ego omnino lucrum omne esse utile homini existimo: 325  
scio ego, multos iam lucrum lutulentos homines reddidit;  
est etiam ubi profecto damnum praestet facere quam lucrum.  
odi ego aurum: multa multis saepe suasit perperam.  
nunc hoc animum advorte, ut ea quae sentio pariter scias.  
filius meus illic apud vos servit captus Alide: 330

eum si reddis mihi, praeterea unum nummum ne duis;  
 et te et hunc amittam hinc. alio pacto abire non potes.  
 TYND. Optimum atque aequissimum oras optumusque hominum es homo.  
 sed is privatam servitutem servit illi an publicam?  
 HEG. Privatam medici Menarchi. TYND. Pol is quidem huius est cliens. 335  
 tam hoc quidem tibi in proclivi quam imber est quando pluit.  
 HEG. Fac is homo ut redimatur. TYND. Faciam. sed te id oro, Hegio--  
 HEG. Quid vis, dum ab re ne quid ores, faciam. TYND. Ausculta, tum scies.  
 ego me amitti, donicum ille huc redierit, non postulo.  
 verum quaeso ut aestumatum hunc mihi des, quem mittam ad patrem, 340  
 ut is homo redimatur illi. HEG. Immo alium potius misero  
 hinc, ubi erunt indutiae, illuc, tuom qui conveniat patrem,  
 qui tua quae tu iusseris mandata ita ut velis perferat.  
 TYND. At nihil est ignotum ad illum mittere: operam luseris.  
 hunc mitte, hic transactum reddet omne, si illuc venerit. 345  
 nec quemquam fidelioem neque cui plus credat potes  
 mittere ad eum nec qui magis sit servos ex sententia,  
 neque adeo cui suom concredat filium hodie audacius.  
 ne vereare, meo periculo huius ego experiar fidem,  
 fretus ingenio eius, quod me esse scit erga se benevolum. 350  
 HEG. Mittam equidem istunc aestumatum tua fide, si vis. TYND. Volo;  
 quam citissime potest, tam hoc cedere ad factum volo.  
 HEG. Num quae causa est quin, si ille huc non redeat, viginti minas  
 mihi des pro illo? TYND. Optuma immo. HEG. Solvite istum nunciam,  
 atque utrumque. TYND. Di tibi omnis omnia optata offerant, 355  
 cum me tanto honore honestas cumque ex vinclis eximis.  
 hoc quidem haud molestumst, iam quod collus collari caret.  
 HEG. Quod bonis bene fit beneficium, gratia ea gravida est bonis.  
 nunc tu illum si illo es missurus, dice monstra praecipe  
 quae ad patrem vis nuntiari. vin vocem huc ad te? TYND. Voca. 360

II.iii

HEG. Quae res bene vortat mihi meoque filio  
 vobisque, volt te novos erus operam dare  
 tuo veteri domino, quod is velit, fideliter.  
 nam ego te aestumatum huic dedi viginti minis,  
 hic autem te ait mittere hinc velle ad patrem, 365  
 meum ut illic redimat filium, mutatio  
 inter me atque illum ut nostris fiat filiis.  
 PHIL. Vtroque vortumst ingenium meum,  
 ad te atque ad illum; pro rota me uti licet:  
 vel ego huc vel illuc vortar, quo imperabitis. 370  
 HEG. Tute tibi tuopte ingenio prodes plurimum,  
 cum servitutem ita fers ut ferri decet.  
 sequere. em tibi hominem. TYND. Gratiam habeo tibi,  
 quom copiam istam mi et potestatem facis,  
 ut ego ad parentes hunc remittam nuntium, 375  
 qui me quid rerum hic agitem et quid fieri velim

patri meo, ordine omnem rem, illuc perferat.  
 nunc ita convenit inter me atque hunc, Tyndare,  
 ut te aestumatum in Alidem mittam ad patrem,  
 si non rebitas huc, ut viginti minas 380  
 dem pro te. PHIL. Recte convenisse sentio.  
 nam pater expectat aut me aut aliquem nuntium,  
 qui hinc ad se veniat. TYND. Ergo animum advortas volo  
 quae nuntiare hinc te volo in patriam ad patrem.  
 PHIL. Philocrates, ut adhuc locorum feci, faciam sedulo, 385  
 ut potissimum quod in rem recte conducat tuam,  
 id petam idque persequar corde et animo atque viribus.  
 TYND. Facis ita ut te facere oportet. nunc animum advortas volo:  
 omnium primum salutem dicito matri et patri  
 et cognatis et si quem alium benevolentem videris; 390  
 me hic valere et servitutum servire huic homini optumo,  
 qui me honore honestiorem semper fecit et facit.  
 PHIL. Istuc ne praecipias, facile memoria memini tamen.  
 TYND. Nam equidem, nisi quod custodem habeo, liberum me esse arbitror.  
 dicito patri, quo pacto mihi cum hoc convenerit 395  
 de huius filio. PHIL. Quae memini, mora mera est monerier.  
 TYND. Vt eum redimat et remittat nostrum huc amborum vicem.  
 PHIL. Meminero. H. At quamprimum pote: istuc in rem utriquest maxime.  
 PHIL. Non tuom tu magis videre quam ille suom gnatum cupit.  
 HEG. Meus mihi, suos cuique est carus. PHIL. Numquid aliud vis patri 400  
 nuntiarum? TYND. Me hic valere et -- tute audacter dicito,  
 Tyndare -- inter nos fuisse ingenio haud discordabili,  
 neque te commeruisse culpam -- neque me adversatum tibi--  
 beneque ero gessisse morem in tantis aerumnis tamen;  
 neque med umquam deseruisse te neque factis neque fide, 405  
 rebus in dubiis egenis. haec pater quando sciet,  
 Tyndare, ut fueris animatus erga suom gnatum atque se,  
 numquam erit tam avarus, quin te gratiis emittat manu ~  
 et mea opera, si hinc rebito, faciam ut faciat facilius.  
 nam tua opera et comitate et virtute et sapientia 410  
 fecisti ut redire liceat ad parentis denuo,  
 cum apud hunc confessus es et genus et divitias meas:  
 quo pacto emisisti e vinclis tuom erum tua sapientia.  
 PHIL. Feci ego ista ut commemoras, et te meminisse id gratum est mihi.  
 merito tibi ea evenerunt a me; nam nunc, Philocrates, 415  
 si ego item memorem quae me erga multa fecisti bene,  
 nox diem adimat; nam quasi servos meus esses, nihilo setius  
 <tu> mihi obsequiosus semper fuisti. HEG. Di vostram fidem,  
 hominum ingenium liberale. ut lacrumas excutiunt mihi.  
 videas corde amare inter se. quantis <lautus> laudibus 420  
 suom erum servos collaudavit. TYND. Pol istic me haud centesimam  
 partem laudat quam ipse meritust ut laudetur laudibus.  
 HEG. Ergo cum optume fecisti, nunc adest occasio  
 bene facta cumulare, ut erga hunc rem geras fideliter.  
 PHIL. Magis non factum possum velle, quam opera experiar persequi; 425

id ut scias, Iovem supremum testem laudo, Hegio,  
 me infidelem non futurum Philocrati. HEG. Probus es homo.  
 PHIL. Nec me secus umquam ei facturum quicquam quam memet mihi.  
 TYND. Istaec dicta te experiri et operis et factis volo;  
 et, quo minus dixi quam volui de te, animum advortas volo, 430  
 atque horunc verborum causa caveto mi iratus fuas;  
 sed, te quaeso, cogitato hinc mea fide mitti domum  
 te aestimatum, et meam esse vitam hic pro te positam pignori,  
 ne tu me ignores, quom extemplo meo e conspectu abscesseris,  
 quom me servom in servitute pro ted hic reliqueris, 435  
 tuque te pro libero esse ducas, pignus deseras  
 neque des operam pro me ut huius reducem facias filium;  
 [scito te hinc minis viginti aestumatum mittier.]  
 fac fidelis sis fideli, cave fidem fluxam geras:  
 nam pater, scio, faciet quae illum facere oportet omnia; 440  
 conserva tibi in perpetuom amicum me, atque hunc inventum inveni.  
 haec per dexteram tuam te dextera retinens manu  
 opsecro, infidelior mihi ne fuas quam ego sum tibi.  
 tu hoc age. tu mihi erus nunc es, tu patronus, tu pater,  
 tibi commendo spes opesque meas. PHIL. Mandavisti satis. 445  
 satin habes, mandata quae sunt facta si refero? TYND. Satis.  
 PHIL. Et tua et tua huc ornatus reveniam ex sententia.  
 numquid aliud? TYND. Vt quam primum possis redeas. PHIL. Res monet.  
 HEG. Sequere me, viaticum ut dem a trapezita tibi,  
 eadem opera a praetore sumam syngraphum. TYND. Quem syngraphum? 450  
 HEG. Quem hic ferat secum ad legionem, hinc ire huic ut liceat domum.  
 tu intro abi. T. Bene ambulato. -- P. Bene vale. H. Edepol rem meam  
 constabilivi, quom illos emi de praeda a quaestoribus;  
 expedivi ex servitute filium, si dis placet.  
 at etiam dubitavi, hos homines emerem an non emerem, diu. 455  
 servate istum sultis intus, servi, ne quoquam pedem  
 ecferat sine custodela. <iam> ego apparebo domi;  
 ad fratrem modo captivos alios invisio meos,  
 eadem percontabor, ecquis hunc adolescentem noverit.  
 sequere tu, te ut amittam; ei rei primum praevorti volo.-- 460

### ACTVS III

#### III.i

ERGASILVS Miser homo est, qui ipse sibi quod edit quaerit et id aegre invenit,  
 sed ille est miserior, qui et aegre quaerit et nihil invenit;  
 ille miserrimust, qui cum esse cupit, tum quod edit non habet.  
 nam hercle ego huic die, si liceat, oculos effodiam libens,  
 ita malignitate oneravit omnis mortalis mihi; 465  
 neque ieiuniosiore neque magis ecfertum fame  
 vidi nec quoi minus procedat quidquid facere occeperit,

ita venter gutturque resident esurialis ferias.  
 ilicet parasiticae arti maximam malam crucem,  
 ita iuventus iam ridiculos inopesque ab se segregat. 470  
 nil morantur iam Lacones unisubseli viros,  
 plagipatidas, quibus sunt verba sine penu et pecunia:  
 eos requirunt, qui libenter, quom ederint, reddant domi;  
 ipsi obsonant, quae parasitorum ante erat provincia,  
 ipsi de foro tam aperto capite ad lenones eunt 475  
 quam in tribu aperto capite sontes condemnant reos;  
 neque ridiculos iam terrunci faciunt, sese omnes amant.  
 nam uti dudum hinc abii, accessi ad adulescentes in foro.  
 'salute' inquam. 'quo imus um' inquam 'ad prandium?' atque illi tacent.  
 'quis ai hoc' aut quis profitetur?' nquam. quasi muti silent, 480  
 neque me rident. 'ub cenamus?' inquam. atque illi abnuont.  
 dico unum ridiculum dictum de dictis melioribus,  
 quibus solebam menstruales epulas ante adipiscier:  
 nemo ridet; scivi extemplo rem de compecto geri;  
 ne canem quidem irritatam voluit quisquam imitarier, 485  
 saltem, si non arriderent, dentes ut restringerent.  
 abeo ab illis, postquam video me sic ludificarier;  
 pergo ad alios, venio ad alios, deinde ad alios: una res.  
 omnes <de> compecto rem agunt, quasi in Velabro olearii.  
 nunc redeo inde, quoniam me ibi video ludificarier. 490  
 item alii parasiti frustra obambulabant in foro.  
 nunc barbarica lege certumst ius meum omne persequi:  
 qui consilium iniere, quo nos victu et vita prohibeant,  
 is diem dicam, irrogabo multam, ut mihi cenas decem  
 meo arbitrato dent, cum cara annona sit. sic egero. 495  
 nunc ibo ad portum hinc: est illic mi una spes cenatica;  
 si ea decolabit, redibo huc ad senem ad cenam asperam.--

### III.ii

HEGIO Quid est suavius, quam bene rem gerere,  
 bono publico, sic ut ego feci heri,  
 cum emi hosce homines: ubi quisque vident, 500  
 eunt obviam gratulanturque eam rem.  
 ita me miserum restitendo  
 retinendoque lassum reddiderunt:  
 vix ex gratulando miser iam eminebam.  
 tandem abii ad praetorem; ibi vix requievi: 505  
 rogo syngraphum, datur mi ilico; dedi Tyndaro: ille abiit domum.  
 inde ilico praevortor domum, postquam id actum est;  
 eo protinus ad fratrem, mei ubi sunt alii captivi.  
 rogo, Philocratem ex Alide ecquis hominum  
 noverit: tandem hic exclamat, eum sibi esse sodalem; 510  
 dico eum esse apud me; hic extemplo orat obsecratque,  
 eum sibi ut liceat videre:  
 iussi ilico hunc exsolvi. nunc tu sequere me,

ut quod me oravisti impetres, eum hominem uti convenias.-- 514-515

### III.iii

TYNDARVS Nunc illud est, cum me fuisse quam esse nimio mavelim: 516  
nunc spes opes auxiliisque a me segregant spernuntque se.  
hic illest dies, cum nulla vitae meae salus sperabilest,  
neque ~ exilium exitio est neque adeo spes, quae mi hunc aspellat metum,  
nec subdolis mendaciis mihi usquam mantellum est meis, 520  
[nec sycophantiis nec fucis ullum mantellum obviam est]  
neque deprecatio perfidiis meis nec male factis fuga est,  
nec confidentiae usquam hospitium est nec deverticulum dolis:  
operta quae fuere aperta sunt, patent praestigiae,  
omnis res palam est, neque de hac re negotium est, 525  
quin male occidam oppetamque pestem eri vicem meamque.  
perdidit me Aristophontes hic qui venit modo intro: ~  
is me novit, is sodalis Philocrati et cognatus est.  
neque iam Salus servare, si volt, me potest, nec copia est,  
nisi si aliquam corde machinor astutiam. 530  
quam, malum? quid machiner? quid comminiscar? maxumas  
nugas ineptus incipisso. haereo.

### III.iv

HEGIO Quo illum nunc hominem proripuisse foras se dicam ex aedibus?  
TYND. Nunc enim vero ego occidi: eunt ad te hostes, Tyndare.  
quid loquar? quid fabulabor? quid negabo aut quid fatebor? 535  
mihi res omnis in incerto sita est. quid rebus confidam meis?  
utinam te di prius perderent, quam periisti e patria tua,  
Aristophontes, qui ex parata re imparatam omnem facis.  
occisa est haec res, nisi reperio atrocem mi aliquam astutiam.  
HEG. Sequere. em tibi hominem. adi, atque adloquere. TYND. Quis homo 540  
est me hominum miserior?  
ARISTOPHONTES Quid istuc est quod meos te dicam fugitare oculos, Tyndare,  
proque ignoto me aspernari, quasi me numquam noveris?  
equidem tam sum servos quam tu, etsi ego domi liber fui,  
tu usque a puero servitatem servivisti in Alide.  
HEG. Edepol minime miror, si te fugitat aut oculos tuos, 545  
aut si te odit, qui istum appelles Tyndarum pro Philocrate.  
TYND. Hegio, hic homo rabiosus habitus est in Alide,  
ne tu quod istic fabuletur auris immittas tuas.  
nam istic hastis insectatus est domi matrem et patrem,  
et illic isti qui insputatur morbus interdum venit. 550  
proin tu ab istoc procul recedas. HEG. Vltro istum a me. A. Ain, verbero?  
me rabiosum atque insectatum esse hastis meum memoras patrem,  
et eum morbum mi esse, ut qui me opus sit insputarier?  
HEG. Ne verere, multos iste morbus homines macerat,  
quibus insputari saluti fuit atque is profuit. 555  
ARIST. Quid tu autem? etiam huic credis? HEG. Quid ego credam huic?

ARIST. Insanum esse me?

TYND. Viden tu hunc, quam inimico voltu intuetur? concedi optimumst,

Hegio: fit quod tibi ego dixi, gliscit rabies, cave tibi.

HEG. Credidi esse insanum extemplo, ubi te appellavit Tyndarum.

TYND. Quin suum ipse interdum ignorat nomen neque scit qui siet. 560

HEG. At etiam te suum sodalem esse aibat. TYND. Haud vidi magis.

et quidem Alcumeus atque Orestes et Lycurgus postea

una opera mihi sunt sodales qua iste. ARIST. At etiam, furcifer,

male loqui mi audes? non ego te novi? HEG. Pol planum id quidem est,

non novisse, qui istum appelles Tyndarum pro Philocrate. 565

quem vides, eum ignoras: illum nominas quem non vides.

ARIST. Immo iste eum sese ait, qui non est, esse, et qui vero est, negat.

TYND. Tu enim repertus, Philocratem qui superes veriverbio.

ARIST. Pol ego ut rem video, tu inventus, ~~via~~ vanitudine

qui convincas. sed quaeso hercle, agedum aspice ad me. TYND. Em. 570

ARIST. Dic modo:

tun negas te Tyndarum esse? T. Nego, inquam. A. Tun te Philocratem

esse ais? TYND. Ego, inquam. ARIST. Tune huic credis? HEG. Plus quidem

quam tibi aut mihi.

nam ille quidem, quem tu hunc memoras esse, hodie hinc abiit Alidem

ad patrem huius. ARIST. Quem patrem, qui servos est? T. Et tu quidem

servos es, liber fuisti, et ego me confido fore, 575

si huius huc reconciliasso in libertatem filium.

ARIST. Quid ais, furcifer? tun te gnatum <esse> memoras liberum?

TYND. Non equidem me Liberum, sed Philocratem esse aio. A. Quid est?

ut scelestus, Hegio, nunc iste <te> ludos facit.

nam is est servos ipse, neque praeter se umquam ei servos fuit. 580

TYND. Quia tute ipse eges in patria nec tibi qui vivas domist,

omnis inveniri similis tui vis; non mirum facis:

est miserorum, ut malevolentes sint atque invideant bonis.

ARIST. Hegio, vide sis, ne quid tu huic temere insistas credere.

atque, ut perspicio, profecto iam aliquid pugnae edidit. 585

filium tuum quod redimere se ait, id ne utiquam mihi placet.

TYND. Scio te id nolle fieri; efficiam tamen ego id, si di adjuvant.

illum restituam huic, hic autem in Alidem me meo patri.

propterea ad patrem hinc amisi Tyndarum. ARIST. Quin tute is es:

neque praeter te in Alide ullus servos istoc nominest. 590

TYND. Pergin servom me exprobrare esse, id quod vi hostili optigit?

ARIST. Enim iam nequeo contineri. T. Heus, audin quid ait? quin fugis?

iam illic hic nos insectabit lapidibus, nisi illunc iubes

comprehendi. ARIST. Crucior. TYND. Ardent oculi: fit opus, Hegio;

viden tu illi maculari corpus totum maculis luridis? 595

atra bilis agitat hominem. ARIST. At pol te, si hic sapiat senex,

pix atra agitet apud carnificem tuoque capiti inluceat.

TYND. Iam deliramenta loquitur, laruae stimulant virum.

hercle qui, si hunc comprehendi iusseris, sapias magis.

ARIST. Crucior, lapidem non habere me, ut illi mastigiae 600

cerebrum excutiam, qui me insanum verbis concinnat suis.

TYND. Audin lapidem quaeritare? ARIST. Solus te solum volo,

Hegio. HEG. Istinc loquere, si quid vis, procul. tamen audiam.  
 TYND. Namque edepol si adbites propius, os denasabit tibi  
 mordicus. ARIST. Neque pol me insanum, Hegio, esse creduis 605  
 neque fuisse umquam, neque esse morbum quem istic autumat.  
 verum si quid metuis a me, iube me vinciri: volo,  
 dum istic itidem vinciat. TYND. Immo enim vero, Hegio,  
 istic, qui volt, vinciat. ARIST. Tace modo. ego te, Philocrates  
 false, faciam ut verus hodie reperiare Tyndarus. 610  
 quid mi abnutas? TYND. Tibi ego abnuto? A. Quid agat, si absis longius?  
 HEG. Quid ais? quid si adeam hunc insanum? TYND. Nugas. ludificabitur,  
 garriet quoi neque pes umquam neque caput compareat.  
 ornamenta absunt: Aiacem, hunc cum vides, ipsum vides. 615  
 HEG. Nihili facio. tamen adibo. TYND. Nunc ego omnino occidi,  
 nunc ego inter sacrum saxumque sto, nec quid faciam scio.  
 HEG. Do tibi operam, Aristophontes, si quid est quod me velis.  
 ARIST. Ex me audibis vera quae nunc falsa opinare, Hegio.  
 sed hoc primum, me expurigare tibi volo, me insaniam 620  
 neque tenere neque mi esse ullum morbum, nisi quod servio.  
 at ita me rex deorum atque hominum faxit patriae compotem,  
 ut istic Philocrates non magis est quam aut ego aut tu. H. Eho dic mihi,  
 quis illic igitur est? ARIST. Quem dudum dixi a principio tibi.  
 hoc si secus reperies, nullam causam dico quin mihi 625  
 et parentum et libertatis apud te deliquio siet.  
 H. Quid tu ais? T. Me tuom esse servom et te meum erum. H. Haud istuc rogo.  
 fuistin liber? TYND. Fui. ARIST. Enim vero non fuit, nugas agit.  
 TYND. Qui tu scis? an tu fortasse fuisti meae matri obstetrix,  
 qui id tam audacter dicere audes? ARIST. Puerum te vidi puer. 630  
 TYND. At ego te video maior maiorem: em rursus tibi.  
 meam rem non cures, si recte facias. num ego curo tuam?  
 HEG. Fuitne huic pater Thensauochrysonicochrysidis?  
 ARIST. Non fuit, neque ego istuc nomen umquam audivi ante hunc diem.  
 Philocrati Theodoromedes fuit pater. TYND. Pereo probe. 635  
 quin quiescis? <i>di</i>directum cor meum, ac suspende te.  
 tu sussultas, ego miser vix asto prae formidine.  
 HEG. Satin istuc mihi exquisitum est, fuisse hunc servom in Alide  
 neque esse hunc Philocratem? A. Tam satis quam numquam hoc invenies secus.  
 sed ubi is nunc est? HEG. Vbi ego minime atque ipsus se volt maxume. 640  
 sed vide sis. ARIST. Quin exploratum dico et provisum hoc tibi. 643  
 HEG. Certon? ARIST. Quin nihil, inquam, invenies magis hoc certo certius.  
 Philocrates iam inde usque amicus fuit mihi a puero puer.  
 HEG. Tum igitur ego deruncinatus, deartuatus sum miser 641  
 huius scelesti techinis, qui me ut lubitum est ductavit dolis.  
 sed qua faciest tuos sodalis Philocrates? ARIST. Dicam tibi: 646  
 macilento ore, naso acuto, corpore albo, oculis nigris,  
 subrufus aliquantum, crispus, cincinnatus. HEG. Convenit.  
 TYND. Vt quidem hercle in medium ego hodie pessume processerim.  
 vae illis virgibus miseris, quae hodie in tergo morientur meo. 650  
 HEG. Verba mihi data esse video. TYND. Quid cessatis, compedes,  
 currere ad me meaque amplecti crura, ut vos custodiam?



HEG. Satin med illi hodie scelesti capti ceperunt dolo?  
illic servom se assimilabat, hic sese autem liberum.  
nucleum amisi, retinui pignori putamina. 655  
ita mihi stolido sursum versum os sublevare offuciis.  
hic quidem me numquam irridebit. Colaphe, Cordalio, Corax,  
ite istinc, ecferte lora.

### III.v

COLAPHVS Num lignatum mittimur?

HEG. Inicite huic manicas \*\*\* mastigiae.  
TYND. Quid hoc est negoti? quid ego deliqui? HEG. Rogas, 660  
sator sartorque scelerum, et messor maxume?  
TYND. Non occatorem dicere audebas prius?  
nam semper occant prius quam sariunt rustici.  
HEG. At ut confidenter \*\*\* mihi contra astitit.  
TYND. Decet innocentem servom atque innoxium 665  
confidentem esse, suom apud erum potissimum.  
HEG. Adstringite isti sultis vehementer manus.  
TYND. Tuos sum, tu has quidem vel praecidi iube.  
sed quid negoti est, quam ob rem suscenses mihi?  
HEG. Quia me meamque rem, quod in te uno fuit, 670  
tuis scelestis falsidicis fallaciis  
deartuasti dilaceravisti atque opes  
confecisti omnes, res ac rationes meas:  
ita mi exemisti Philocratem fallaciis.  
illum esse servom credidi, te liberum; 675  
ita vosmet aiebatis itaque nomina  
inter vos permutastis. TYND. Fateor, omnia  
facta esse ita ut <tu> dicis, et fallaciis  
abiisse eum abs te mea opera atque astutia;  
an, obsecro hercle te, id nunc suscenses mihi? 680  
HEG. At cum cruciatu maxumo id factumst tuo.  
TYND. Dum ne ob male facta, peream, parvi aestumo.  
si ego hic peribo, ast ille ut dixit non redit,  
at erit mi hoc factum mortuo memorabile,  
<me> meum erum captum ex servitute atque hostibus 685  
reducem fecisse liberum in patriam ad patrem,  
meumque potius me caput periculo  
praeoptavisse, quam is periret, ponere.  
HEG. Facito ergo ut Acherunti clueas gloria.  
TYND. Qui per virtutem, periit, at non interit. 690  
HEG. Quando ego te exemplis pessumis cruciavero  
atque ob sutelas tuas te morti misero,  
vel te interiisse vel periisse praedicient;  
dum pereas, nihil intererit: dicant vivere.  
TYND. Pol si istuc faxis, haud sine poena feceris, 695  
si ille huc rebitet, sicut confido affore.  
ARIST. Pro di immortales, nunc ego teneo, nunc scio

quid hoc sit negoti. meus sodalis Philocrates  
in libertate est ad patrem in patria. bene est,  
nec quisquam est mihi, aequè melius cui velim. 700  
sed hoc mihi aegre est, me huic dedisse operam malam,  
qui nunc propter me meaque verba vinctus est.  
HEG. Votuin te quicquam mi hodie falsum proloqui?  
TYND. Votuisti. HEG. Cur es ausus mentiri mihi?  
TYND. Quia vera obessent illi quoi operam dabam: 705  
nunc falsa prosunt. HEG. At tibi oberunt. TYND. Optumest.  
at erum servavi, quem servatum gaudeo,  
cui me custodem addiderat erus maior meus.  
sed malene id factum arbitrare? HEG. Pessume.  
TYND. At ego aio recte, qui abs te sorsum sentio. 710  
nam cogitato, si quis hoc gnato tuo  
tuos servos faxit, qualem haberes gratiam?  
emitteresne necne eum servom manu?  
essetne apud te is servos acceptissimus?  
responde. HEG. Opinor. TYND. Cur ergo iratus mihi es? 715  
HEG. Quia illi fuisti quam mihi fidelior.  
TYND. Quid? tu una nocte postulavisti et die  
recens captum hominem, nuperum novicium,  
te perdocere ut melius consulerem tibi,  
quam illi, quicum una <a> puero aetatem exegeram? 720  
HEG. Ergo ab eo petito gratiam istam. ducite,  
ubi ponderosas crassas capiat compedes.  
inde ibis porro in latomias lapidarias.  
ibi quom alii octonos lapides effodiunt, nisi  
cotidiano sesquiopus confeceris, 725  
Sescentoplago nomen indetur tibi.  
ARIST. Per deos atque homines ego te obtestor, Hegio,  
ne tu istunc hominem perduis. HEG. Curabitur;  
nam noctu nervo vinctus custodibitur,  
interdius sub terra lapides eximet: 730  
diu ego hunc cruciabo, non uno absolvam die.  
ARIST. Certumne est tibi istuc? HEG. Non moriri certius.  
abducite istum actutum ad Hippolytum fabrum,  
iubete huic crassas compedes impingier;  
inde extra portam ad meum libertum Cordalum 735  
in lapicidinas facite deductus siet:  
atque hunc me velle dicite ita curarier,  
ne qui deterius huic sit quam cui pessume est.  
TYND. Cur ego te invito me esse salvom postulem?  
periculum vitae meae tuo stat periculo. 740  
post mortem in morte nihil est quod metuum mali.  
etsi pervivo usque ad summam aetatem, tamen  
breve spatium est perferundi quae minitas mihi.  
vale atque salve, etsi aliter ut dicam meres.  
tu, Aristophontes, de me ut meruisti, ita vale; 745  
nam mihi propter te hoc optigit. HEG. Abducite.

TYND. At unum hoc quaeso, si huc rebitet Philocrates,  
 ut mi eius facias conveniundi copiam.  
 HEG. Periistis, nisi hunc iam e conspectu abducitis.  
 TYND. Vis haec quidem hercle est, et trahi et trudi simul.-- 750  
 HEG. Illic est abductus recta in phylacam, ut dignus est.  
 ego illis captivis aliis documentum dabo,  
 ne tale quisquam facinus incipere audeat.  
 quod absque hoc esset, qui mihi hoc fecit palam,  
 usque offrenatum suis me ductarent dolis. 755  
 nunc certum est nulli posthac quicquam credere.  
 satis sum semel deceptus. speravi miser  
 ex servitute me exemisse filium:  
 ea spes elapsa est. perdiidi unum filium,  
 puerum quadrimum quem mihi servos surpuit, 760  
 neque eum servom umquam repperi neque filium;  
 maior potitus hostium est. quod hoc est scelus?  
 quasi in orbitatem liberos produxerim.  
 sequere hac. reducam te ubi fuisti. neminis  
 miserere certum est, quia mei miseret neminem.-- 765  
 ARIST. Exauspicavi ex vinculis. nunc intellego  
 redauspicandum esse in catenas denuo.--

#### ACTVS IV

##### IV.i

ERGASILVS Iuppiter supreme, servas me measque auges opes,  
 maximas opimitates opiparasque offers mihi,  
 laudem lucrum, ludum iocum, festivitatem ferias, 770  
 pompam penum, potationis saturitatem, gaudium,  
 nec cuiquam homini supplicare \*\*\* nunc certum est mihi;  
 nam vel prodesse amico possum vel inimicum perdere,  
 ita hic me amoenitate amoena amoenus oneravit dies.  
 sine sacris hereditatem sum aptus effertissimam. 775  
 nunc ad senem cursum capessam hunc Hegionem, cui boni  
 tantum affero quantum ipsus a dis optat, atque etiam amplius.  
 nunc certa res est, eodem pacto ut comici servi solent  
 coniciam in collum pallium, primo ex med hanc rem ut audiat;  
 speroque me ob hunc nuntium aeternum adepturum cibum. 780

##### IV.ii

HEGIO Quanto in pectore hanc rem meo magis voluto,  
 tanto mi aegritudo auctior est in animo.  
 ad illum modum sublitum os esse mi hodie!  
 neque id perspicere quivi.  
 quod cum scibitur, <tum> per urbem inridebor. 785

cum extemplo ad forum advenero, omnes loquentur:  
 ' **hi** ille est senex doctus, quoi verba data sunt.'  
 sed Ergasilus estne hic, procul quem video?  
 conlecto quidem est pallio. quidnam acturust?  
 ERG. Move aps te moram atque, Ergasile, age hanc rem. 790  
 emenor interminorque, ne mi obstiterit obviam  
 nisi quis satis diu vixisse sese homo arbitrabitur.  
 nam qui obstiterit, ore sistet. HEG. Hic homo pugilatum incipit.  
 ERG. Facere certumst. proinde ita omnes itinera insistant sua,  
 ne quis in hanc plateam negoti conferat quicquam sui. 795  
 nam meus est ballista pugnus, cubitus catapultast mihi,  
 umerus aries, tum genu quemque icero ad terram dabo,  
 dentilegos omnes mortales faciam, quemque offendero.  
 HEG. Quae illaec eminatiost nam? nequeo mirari satis.  
 ERG. Faciam ut huius diei locique meique semper meminerit. 800  
 [Qui mihi in cursu opstiterit, faxo vitae is extemplo opstiterit suae.]  
 HEG. Quid hic homo tantum incipissit facere cum tantis minis?  
 ERG. Prius edico, ne quis propter culpam capiatu suam:  
 continete vos domi, prohibete a vobis vim meam.  
 HEG. Mira edepol sunt, ni hic in ventrem sumpsit confidentiam. 805  
 vae misero illi, cuius cibo iste factust imperiosior.  
 ERG. Tum pistores scrofipasci, qui alunt furfuribus sues,  
 quarum odore praeterire nemo pistrinum potest:  
 eorum si quousquam scrofam in publico conspexero,  
 ex ipsis dominis meis pugnis exculcabo furfures. 810  
 HEG. Basilicas edictiones atque imperiosas habet:  
 satur homost, habet profecto in ventre confidentiam.  
 ERG. Tum piscatores, qui praebent populo pisces foetidos,  
 qui advehuntur quadrupedanti crucianti cantherio,  
 quorum odos subbasilicanos omnes abigit in forum, 815  
 eis ego ora verberabo surpiculis piscariis,  
 ut sciant, alieno naso quam exhibeant molestiam.  
 tum lanii autem, qui concinnant liberis orbas oves,  
 qui locant caedundos agnos et duplam agninam danunt,  
 qui petroni nomen indunt verveci sectario, 820  
 eum ego si in via petronem publica conspexero,  
 et petronem et dominum reddam mortales miserrumos.  
 HEG. Eugepae, edictiones aedilicias hic quidem habet,  
 mirumque adeost ni hunc fecere sibi Aetoli agoranomum.  
 ERG. Non ego nunc parasitus sum, sed regum rex regalior, 825  
 tantus ventri commeatus meo adest in portu cibus.  
 sed ego cesso hunc Hegionem onerare laetitia senem,  
 quo homine <hominum> adaeque nemo vivit fortunatior?  
 HEG. Quae illaec est laetitia, quam illic laetus largitur mihi?  
 ERG. Heus ubi estis? ecquis <hic est? ecquis> hoc aperit ostium? 830  
 H. Hic homo ad cenam recipit se ad me. E. Aperite hasce ambas fores  
 prius quam pultando assulatim foribus exitium adfero.  
 H. Perlubet hunc hominem colloqui. Ergasile. E. Ergasilum qui vocat?  
 HEG. Respice. ERG. Fortuna quod tibi nec facit nec faciet, me iubes.

sed quis est? HEG. Respice ad me, Hegio sum. ERG. Oh mihi, 835  
 quantum est hominum optumorum optume, in tempore advenis.  
 HEG. Nescio quem ad portum nactus es ubi cenas, eo fastidis.  
 E. Cedo manum. H. Manum? E. Manum, inquam, cedo tuam actutum. HEG. Tene.  
 E. Gaude. H. Quid ego gaudeam? E. Quia ego impero, age gaude modo.  
 HEG. Pol maerores mi antevortunt gaudiis. ERG. [Noli irascier] 840  
 iam ego ex corpore exigam omnis maculas maerorum tibi.  
 gaude audacter. HEG. Gaudeo, etsi nil scio quod gaudeam.  
 ERG. Bene facis. Iube -- HEG. Quid iubeam? E. Ignem ingentem fieri.  
 H. Ignem ingentem? E. Ita dico, magnus ut sit. H. Quid? me, volturi,  
 tuan causa aedis incensurum censes? ERG. Noli irascier. 845  
 iuben an non iubes astitui aulas, patinas elui,  
 ~ laridum atque epulas foveri focus ferventibus?  
 alium pisces praestinatam abire? HEG. Hic vigilans somniat.  
 ERG. Alium porcinam atque agninam et pullos gallinaceos?  
 HEG. Scis bene esse, si sit unde. ERG. ~ Pernam atque ophthalmiam, 850  
 horaeum, scombrum et trygonum et cetum, et mollem caseum?  
 HEG. Nominandi istorum tibi erit magis quam edundi copia  
 hic apud me, Ergasile. ERG. Mean me causa hoc censes dicere?  
 HEG. Nec nihil hodie nec multo plus tu hic edes, ne frustra sis.  
 proin tu tui cottidiani victi ventrem ad me afferas. 855  
 ERG. Quin ita faciam, ut <tu>te cupias facere sumptum, etsi ego vetem.  
 H. Egone? E. Tune. H. Tum tu mi igitur erus es. E. Immo benevolens.  
 vin te faciam fortunatum? HEG. Malim quam miserum quidem.  
 E. Cedo manum. H. Em manum. E. Di te omnes adjuvant. H. Nil sentio.  
 ERG. Non enim es in senticeto, eo non sentis. sed iube 860  
 vasa tibi pura apparari ad rem divinam cito,  
 atque agnum afferri proprium pinguem. HEG. Cur? ERG. Vt sacrifices.  
 H. Cui deorum? E. Mi hercle, nam ego nunc tibi sum summus Iuppiter,  
 idem ego sum Salus, Fortuna, Lux, Laetitia, Gaudium.  
 proin tu deum hunc saturitate facias tranquillum tibi. 865  
 HEG. Esurire mihi videre. ERG. Mi quidem esurio, non tibi.  
 HEG. Tuo arbitrato, facile patior. ERG. Credo, consuetu' puer.  
 HEG. Iuppiter te dique perdant. E. Te hercle -- mi aequom est gratias  
 agere ob nuntium; tantum ego nunc porto a portu tibi boni:  
 nunc tu mihi places. HEG. Abi, stultu' s, oro post tempus venis. 870  
 ERG. Igitur olim si advenissem, magis tu tum istuc diceres;  
 nunc hanc laetitiam accipe a me, quam fero. nam filium  
 tuom modo in portu Philopolemum vivom, salvom et sospitem  
 vidi in publica celoce, ibidemque illum adolescentulum  
 Aleum una et tuom Stalagmum servom, qui aufugit domo, 875  
 qui tibi surripuit quadrimum puerum filiolum tuom.  
 HEG. Abi in malam rem, ludis me. ERG. Ita me amabit sancta Saturitas,  
 Hegio, itaque suo me semper condecoret cognomine,  
 ut ego vidi. H. Meum gnatum? E. Tuom gnatum et genium meum.  
 H. Et captivom illum Alidensem? E. Ma ton Apollon. H. Et servolum 880  
 meum Stalagmum, meum qui gnatum surripuit? ERG. Nai tan Koran.  
 H. Iam credo? E. Nai tan Prainesten. H. Venit? E. Nai tan Signian.  
 H. Certon? E. Nai ton Phrousinona. H. Vide sis. E. Nai ton Alatrion.

HEG. Quid tu per barbaricas urbes iuras? ERG. Quia enim item asperae  
sunt ut tuom victum autumabas esse. HEG. Vae aetati tuae. 885  
ERG. Quippe quando mihi nil credis, quod ego dico sedulo.  
sed Stalagmus quouius erat tunc nationis, cum hinc abit?  
HEG. Siculus. ERG. At nunc Siculus non est, Boius est, Boiam terit:  
liberorum quaerundorum causa ei, credo, uxor datast.  
HEG. Dic, bonan fide tu mi istaec verba dixisti? ERG. Bona. 890  
HEG. Di immortales, iterum gnatus videor, si vera autumas.  
ERG. Ain tu? dubium habebis etiam, sancte quom ego iurem tibi?  
postremo, Hegio, si parva iuri iurandost fides,  
vise ad portum. HEG. Facere certumst. tu intus cura quod opus est.  
sume, posce, prome quid vis. te facio cellarium. 895  
ERG. Nam hercle, nisi mantiscinatus probe ero, fusti pectito.  
HEG. Aeternum tibi dapinabo victum, si vera autumas.  
E. Vnde id? H. A me meoque gnato. E. Sponden tu istud? H. Spondeo.  
ERG. At ego tuom tibi advenisse filium respondeo.  
HEG. Cura quam optume potes.--

#### IV.iii

ERG. Bene ambula et redambula. 900  
illic hinc abiit, mihi rem summam credidit cibariam.  
di immortales, iam ut ego collos praetruncabo tegoribus,  
quanta pernis pestis veniet, quanta labes larido,  
quanta sumini absumedo, quanta callo calamitas,  
quanta laniis lassitudo, quanta porcinariis. 905  
nam si alia memorem, quae ad ventris victum conducunt, morast.  
nunc ibo, ut pro praefectura mea ius dicam larido,  
et quae pendent indemnatae pernae, eis auxilium ut feram.--

#### IV.iv

PVER Diespiter te dique, Ergasile, perdant et ventrem tuom,  
parasitosque omnis, et qui posthac cenam parasitis dabit. 910  
clades calamitasque, intemperies modo in nostram advenit domum.  
quasi lupo esuriens <ille> metui ne in me faceret impetum.  
ubi \* \* \* impetum 912a  
nimisque hercle ego illum male formidabam, ita frendebat dentibus.  
adveniens deturbavit totum cum carne carnarium:  
arripuit gladium, praetruncavit tribus tegoribus glandia; 915  
aulas calicesque omnes confregit, nisi quae modiales erant.  
cocum percontabatur, possentne seriae fervere.  
cellas refregit omnis intus reclusitque armarium.  
adservate istunc, sultis, servi. ego ibo, ut conveniam senem,  
dicam ut sibi penum alium adornet, siquidem sese uti volet; 920  
nam hic quidem, ut adornat, aut iam nihil est aut iam nihil erit.--

#### ACTVS V

V.i

HEGIO Iovi disque ago gratias merito magnas,  
quom reducem tuo te patri reddiderunt  
quomque ex miseriis plurimis me exemerunt,  
~ quae adhuc te carens dum hic fui sustentabam, 925  
quomque hunc conspicio in potestate nostra,  
quomque huius reperta est fides firma nobis.  
PHILOPOLEMVS Satis iam dolui ex animo, et cura me satis et lacrumis maceravi,  
satis iam audivi tuas aerumnas, ad portum mihi quas memorasti.  
hoc agamus. PHILOCRATES Quid nunc, quoniam tecum servavi fidem 930  
tibi hunc reducem in libertatem feci? HEG. Fecisti ut tibi,  
Philocrates, numquam referre gratiam possim satis,  
proinde ut tu promeritu' s donec et filio. PHILOP. Immo potes,  
pater, et poteris et ego potero, et di eam potestatem dabunt  
ut beneficium bene merenti nostro merito muneres; 935  
sicut nunc potes, pater mi, facere merito maxime.  
HEG. Quid opust verbis? lingua nullast qua negem quidquid roges.  
PHILOCR. Postulo abs te, ut mi illum reddas servom, quem hic reliqueram  
pignus pro me, qui mihi melior quam sibi semper fuit,  
pro bene factis eius ut ei pretium possim reddere. 940  
HEG. Quod bene fecisti referetur gratia id quod postulas;  
et id et aliud, quod me orabis, impetrabis. atque te  
nolim suscensere quod ego iratus ei feci male.  
PHILOCR. Quid fecisti? HEG. In lapidinas compeditum condidi,  
ubi rescivi mihi data esse verba. PHILOCR. Vae misero mihi, 945  
propter meum caput labores homini evenisse optumo.  
HEG. At ob eam rem mihi libellam pro eo argenti ne duis:  
gratiis a me, ut sit liber, ducito. PHILOCR. Edepol, Hegio,  
facis benigne. sed quaeso, hominem ut iubeas arcessi. HEG. Licet.  
ubi estis vos? ite actutum, Tyndarum huc arcessite. 950  
vos ite intro. interibi ego ex hac statua verberea volo  
erogitare, meo minore quid sit factum filio.  
vos lavate interibi. PHILOP. Sequere hac, Philocrates, me intro.--  
PHILOCR. Sequor.--

V.ii

HEG. Age tu illuc procede, bone vir, lepidum mancupium meum.  
STALAGMVS Quid me oportet facere, ubi tu talis vir falsum autumas? 955  
fui ego bellus, lepidus: bonus vir numquam, neque frugi bonae,  
neque ero umquam, ne <erres>: spem ponas me bonae frugi fore.  
HEG. Propemodum ubi loci fortunae tuae sint facile intellegis.  
si eris verax, tua ex re, facies ex mala meliusculam.  
recte et vera loquere, sed neque vere neque <tu> recte adhuc 960  
fecisti umquam. STAL. Quod ego fatear, credin pudeat cum autumes?  
HEG. At ego faciam ut pudeat, nam in ruborem te totum dabo.

STAL. Eia, credo ego imperito plagas minitaris mihi.  
 tandem ista aufer <ac> dic quid fers, ut feras hinc quod petis.  
 HEG. Satis facundu' s. & iam fieri dicta compendi volo. 965  
 STAL. Vt vis fiat. HEG. Bene morigerus fuit puer, nunc non decet.  
 hoc agamus. iam animum advorte ac mihi quae dicam edissere.  
 [si eris verax, <ex> tuis rebus feceris meliusculas.]  
 STAL. Nugae istaec sunt. non me censes scire quid dignus siem?  
 HEG. At ea subterfugere potis es pauca, si non omnia. 970  
 STAL. Pauca effugiam, scio; nam multa evenient, et merito meo,  
 quia et fugi et tibi surripui filium et eum vendidi.  
 HEG. Cui homini? STAL. Theodoromedi in Alide Polyplusio,  
 sex minis. HEG. Pro di immortales, is quidem huius est pater  
 Philocrati. STAL. Quin melius novi quam tu et vidi saepius. 975  
 HEG. Serva, Iuppiter supreme, et me et meum gnatum mihi.  
 Philocrates, per tuom te genium obsecro, exi, te volo.

#### V.iii

PHILOCRATES Hegio, assum. si quid me vis, impera. HEG. Hic gnatum meum  
 tuo patri ait se vendidisse sex minis in Alide.  
 PHILOCR. Quam diu id factum est? STAL. Hic annus incipit vicensimus. 980  
 PHILOCR. Falsa memorat. STAL. Aut ego aut tu. nam tibi quadrimulum  
 tuos pater peculiarem parvulo puero dedit.  
 PHILOCR. Quid erat ei nomen? si vera dicis, memoradum mihi.  
 STAL. Paegnium vocitast, post vos indidistis Tyndaro.  
 PHILOCR. Cur ego te non novi? STAL. Quia mos est oblivisci hominibus 985  
 neque novisse cuius nihili sit faciunda gratia.  
 PHILOCR. Dic mihi, isne istic fuit, quem vendidisti meo patri,  
 qui mihi peculiaris datus est? STAL. Huius filius.  
 HEG. Vivitne is homo? STAL. Argentum accepi, nil curavi ceterum.  
 HEG. Quid tu ais? PHILOCR. Quin istic ipsust Tyndarus tuos filius, 990  
 ut quidem hic argumenta loquitur. nam is mecum a puero puer  
 bene pudiceque educast usque ad adulescentiam.  
 HEG. Et miser sum et fortunatus, si <vos> vera dicitis;  
 eo miser sum quia male illi feci, si gnatust meus.  
 eheu, quom ego plus minusve feci quam <me> aequom fuit. 995  
 quod male feci crucior; modo si infectum fieri possiet.  
 sed eccum incedit huc ornatus haud ex suis virtutibus.

#### V.iv

TYNDARVS Vidi ego multa saepe picta, quae Acherunti fierent  
 cruciamenta, verum enim vero nulla adaeque est Acheruns  
 atque ubi ego fui, in lapacidinis. illic ibi demumst locus, 1000  
 ubi labore lassitudo est exigunda ex corpore.  
 nam ubi illo adveni, quasi patriciis pueris aut monerulae,  
 aut anites aut coturnices dantur, quicum lusitent,  
 itidem mi haec adveniienti upupa, qui me delectem, datast.  
 sed erus eccum ante ostium, et erus alter eccum ex Alide 1005



rediit. HEG. Salve, exoptate gnate mi. TYND. Hem, quid gnate mi?  
 attat, scio cur te patrem adsimules esse et me filium:  
 quia mi item ut parentes lucis das tuendi copiam.  
 PHILOCR. Salve, Tyndare. T. Et tu, quouis causa hanc aerumnam exigo.  
 PHILOCR. At nunc liber in divitias faxo venies. nam tibi 1010  
 pater hic est; hic servos, qui te huic hinc quadrimum surpuit,  
 vendidit patri meo te sex minis, is te mihi  
 parvolum peculiarem parvolo puero dedit:  
 illic indicium fecit; nam hunc ex Alide huc reduximus.  
 TYND. Quid huius filium? PHILOCR. Intus eccum fratrem germanum tuom. 1015  
 [TYND. Quid tu ais? adduxtin illum huius captivom filium?  
 PHILOCR. Quin, inquam, intus hic est. T. Fecisti edepol et recte et bene.  
 PHILOCR. Nunc tibi pater hic est: hic fur est tuos, qui parvom hinc te abstulit.  
 TYND. At ego hunc grandis grandem natu ob furtum ad carnificem dabo.  
 PHILOCR. Meritus est. T. Ergo edepol <merito> meritam mercedem dabo. 1020  
 sed <tu> dic oro: pater meus tune es? HEG. Ego sum, gnate mi.  
 TYND. Nunc demum in memoriam redeo, cum mecum recogito.]  
 nunc edepol demum in memoriam regredior, audisse me  
 quasi per nebulam, Hegionem meum patrem vocarier.  
 HEG. Is ego sum. PHILOCR. Compedibus quaeso ut tibi sit levior filius 1025  
 atque huic gravior servos. HEG. Certum est principio id praevortier.  
 eamus intro, ut arcessatur faber, ut istas compedes  
 tibi adimam, huic dem. STAL. Quoi peculi nihil est, recte feceris.

## CATERVA

Spectatores, ad pudicos mores facta haec fabula est,  
 neque in hac subigitationes sunt neque ulla amatio 1030  
 nec pueri suppositio nec argenti circumductio,  
 neque ubi amans adulescens scortum liberet clam suom patrem.  
 huius modi paucas poetae reperiunt comoedias,  
 ubi boni meliores fiant. nunc vos, si vobis placet  
 et si placuimus neque odio fuimus, signum hoc mittite: 1035  
 qui pudicitiae esse voltis praemium, plausum date.